

## （增廣昔時賢文）

昔時賢文，誨汝諄諄。

集韻增廣，多見多聞。

觀今宜鑒古，無古不成今。

知己知彼，將心比心。

酒逢知己飲，詩向會人吟。

相識滿天下，知心能幾人。

相逢好似初相識，到老終無怨恨心。

近水知魚性，近山識鳥音。

易漲易退山溪水，易反易覆小人心。

運去金成鐵，時來鐵似金。

讀書須用意，一字值千金。

逢人且說三分話，未可全拋一片心。

有意栽花花不發，無心插柳柳成蔭。  
畫虎畫皮難畫骨，知人知面不知心。  
錢財如糞土，仁義值千金。

流水下灘非有意，白雲出岫本無心。  
當時若不登高望，誰信東流海洋深。  
路遙知馬力，事久見人心。

兩人一般心，有錢堪買金。一人一般心，無錢堪買針。  
相見易得好，人生難為人。

馬行無力皆因瘦，人若風流定必貧。  
饒人不是痴漢，痴漢便不饒人。

是親不是親，非親卻是親。  
美不美鄉中水，親不親故鄉人。

鶯花猶怕春光老，豈可教人枉度春。

相逢不飲空歸去，洞口桃花也笑人。  
紅粉佳人休便老，風流才子莫教貧。  
在家不會迎賓客，出外方知少主人。  
黃金無假，阿魏無真。

客來主不顧，應恐是痴人。

貧居鬧市無人識，富在深山有遠親。  
誰人背後無人說，那個人前不說人。  
有錢道真語，無錢語不真。

不信但看筵中酒，酒杯先勸有錢人。  
鬧裡有錢，靜處安身。

來如風雨，去似微塵。

長江後浪催前浪，世上新人攢舊人。  
近水樓臺先得月，向陽花木易逢春。

古人不見今時月，今月曾經照古人。

先到為君，後到為臣。

莫道君行早，更有早行人。

莫信直中直，須防仁不仁。

山中有直樹，世上無直人。

自恨枝無葉，莫怨太陽偏。

萬般都是命，半點不由人。

一年之計在於春，一日之計在於寅。

一家之計在於和，一生之計在於勤。

責人之心責己，恕己之心恕人。

守口如瓶，防意如城。

寧可負我，切莫負人。

積善成名，積惡滅身。

再三行善事，第一莫欺心。  
虎生猶可近，人熟不堪親。  
來說是非者，便是是非人。  
遠水難救近火，遠親不如近鄰。  
有錢有酒多兄弟，急難何曾見一人。  
人情似紙張張薄，世事如棋局局新。  
山中也有千年樹，世上難逢百歲人。  
力微休負重，言輕莫勸人。  
無錢休入眾，遭難莫尋親。  
平生莫做皺眉事，世上應無切齒人。  
士者國之寶，儒為席上珍。  
若要斷酒法，醒眼看醉人。  
求人須求大丈夫，濟人須濟急時無。

渴時一滴如甘露，醉後添杯不如無。  
久住令人賤，貧來親也疏。

酒中不語真君子，財上分明大丈夫。  
出家如初，成佛有餘。

積金千兩，不如明解經書。

養子不教如養驢，養女不教如養豬。

有田不耕倉廩虛，有書不讀子孫愚。

倉廩虛兮歲月乏，子孫愚兮禮義疏。

同君一夜話，勝讀十年書。

人不通古今，馬牛而襟裾。

茫茫四海人無數，那個男兒是丈夫。

白酒釀成延好客，黃金散盡為收書。

救人一命，勝造七級浮屠。

城門失火，殃及池魚。

庭前生瑞草，好事不如無。

欲求真富貴，須下死工夫。

百年成之不足，一旦壞之有餘。

人心似鐵，官法如爐。

善化不足，惡化有餘。

水太清則無魚，人太緊則無智。

知者減半，省者全無。

在家由父，出嫁從夫。

癡人畏婦，**賢**女敬夫。

是非終日有，不聽自然無。

寧可正而不足，不可邪而有餘。

寧可信其有，不可信其無。

竹籬茅舍風光好，道院僧房總不如。  
命裡有時終須有，命裡無時莫強求。  
道院迎仙客，書房隱相儒。  
庭栽棲鳳竹，池養化龍魚。  
結交須勝己，似我不如無。  
但看三五日，相見不如初。  
人情似水分高下，世事如雲任捲舒。  
會說說都市，不會說屋裡。  
磨刀恨不利，刀利傷人指。  
求財恨不多，財多害人己。  
知足常足終身不辱，知止常止終身不恥。  
有福傷財，無福損己。  
差之毫釐，失之千里。

若登高必自卑，若行遠必自邇。

三思而行，再斯可矣。

使口不如自走，求人不如求己。

小時是兄弟，長大各鄉里。

妬財莫妬食，怨生莫怨死。

人見白頭嗔，我見白頭喜。

多少少年亡，不到白頭死。

牆有縫，壁有耳。

好事不出門，惡事傳千里。

賊是小人，智過君子。

君子固窮，小人窮斯濫矣。

貧窮自在，富貴多憂。

不以為德，反以為仇。

寧向直中取，不可曲中求。

人無遠慮，必有近憂。

知我者謂我心憂，不知我者謂我何求。

晴乾不肯去，直待雨淋頭。

成事莫說，覆水難收。

是非只為多開口，煩惱皆因強出頭。

忍得一時之氣，免得百日之憂。

近來學得烏龜法，得縮頭時且縮頭。

懼法朝朝樂，欺公日日憂。

人生一世，草生一春。

白髮不隨人而去，看來又是白頭翁。

月到十五光明少，人到中年萬事休。

兒孫自有兒孫福，莫把兒孫作馬牛。

人生不滿百，常懷千歲憂。

今朝有酒今朝醉，明日愁來明日愁。  
路逢險處難迴避，事到頭來不自由。  
藥能醫假病，酒不解真愁。

人平不語，水平不流。

一家養女百家求，一馬不行百馬憂。  
有花方酌酒，無月不登樓。

三杯通大道，一醉解千愁。

深山畢竟藏猛虎，大海終須納細流。  
惜花須檢點，愛月不梳頭。

大抵選他肌骨好，不敷紅粉也風流。  
受恩深處宜先退，得意濃時便可休。  
莫待是非來入耳，從前恩愛反為仇。

留得五湖明月在，不愁無處下金鉤。

休別有魚處，莫戀淺灘頭。

去時終須去，再三留不住。

忍一句息一怒，饒一著退一步。

三十不豪，四十不富，五十將相尋死路。

生不認魂，死不認屍。

父母恩深終有別，夫妻義重也分離。

人生似鳥同林宿，大限來時各自飛。

人善被人欺，馬善被人騎。

人無橫財不富，馬無夜草不肥。

人惡人怕天不怕，人善人欺天不欺。

善惡到頭終有報，只爭來早與來遲。

黃河尚有澄清日，豈可人無得運時。

得寵思辱，居安思危。

念念有如臨敵日，心心常似過橋時。  
英雄行險道，富貴似花枝。

人情莫道春光好，只怕秋來有冷時。  
送君千里，終須一別。

但將冷眼見螃蟹，看他橫行到幾時。  
見事莫說，問事不知。

閑事莫管，無事早歸。

假饒染就真紅色，也被旁人說是非。  
善事可作，惡事莫為。

許人一物，千金不移。

龍生龍子，虎生豹兒。

龍游淺水遭蝦戲，虎落平陽被犬欺。

一舉首登龍虎榜，十年身到鳳凰池。  
十年窗下無人問，一舉成名天下知。  
酒債尋常行處有，人生七十古來稀。  
養兒防老，積穀防饑。  
雞豚狗彘之畜，無失其時。  
數口之家，可以無饑矣。  
常將有日思無日，莫把無時思有時。  
時來風送滕王閣，運去雷轟薦福碑。  
入門休問榮枯事，觀看容顏便得知。  
官清書吏瘦，神靈廟祝肥。  
息卻雷霆之怒，罷卻虎狼之威。  
饒人算知本，輸人算之機。  
好言難得，惡語易施。

一言既出，駟馬難追。

道吾好者是吾賊，道吾惡者是吾師。  
路逢險處須當避，不是才人莫獻詩。

三人同行，必有我師焉。

擇其善者而從之，其不善者而改之。

少年不努力，老大徒傷悲。

人有善願，天必從之。

莫飲卯時酒，昏昏醉到酉。

莫罵酉時妻，一夜受孤淒。

種麻得瓜，種豆得豆。

天網恢恢，疏而不漏。

見官莫向前，做客莫在後。

寧添一斗，莫添一口。

螳螂捕蟬，豈知黃雀在後。

不求金玉重重貴，但願兒孫個個賢。

一日夫妻，百世姻緣。

百世修來同船渡，千世修來共枕眠。

殺人一萬，自損三千。

傷人一語，利如刀割。

枯木逢春猶再發，人無兩度再少年。

未晚先投宿，雞鳴早看天。

將相額頭堪走馬，公侯肚裡好撐船。

富人思來年，貧人思眼前。

世上若要人情好，賒去物件莫取錢。

死生有命，富貴在天。

擊石原有火，不擊乃無煙。

人學始知道，不學亦徒然。  
莫笑他人老，終須還到我。  
但能依本分，終身無煩惱。  
君子愛財，取之有道。  
貞婦愛色，納之以禮。  
善有善報，惡有惡報。  
不是不報，日子未到。  
人而無信，不知其可也。  
一人道好，千人傳實。  
凡事要好，須問三老。  
若爭小利，便失大道。  
年年防饑，夜夜防盜。  
學者如禾如稻，不學者如蒿如草。

遇飲酒時須飲酒，得高歌處且高歌。  
因風吹火，用力不多。

不因漁父引，怎得見波濤。

無求到處人情好，不飲從他酒價高。  
知事少時煩惱少，識人多處是非多。  
入山不怕傷人虎，只怕人情兩面刀。  
強中自有強中手，惡人自有惡人磨。  
會使不在家豪富，風流不用著衣多。  
光陰似箭，日月如梭。

天時不如地利，地利不如人和。

黃金未為貴，安樂值錢多。

世上萬般皆下品，思量惟有讀書高。  
世間好語佛說盡，天下名山僧佔多。

為善最樂，為惡難逃。

羊有跪乳之恩，鴉有反哺之義。

你急他未急，人閑心不閑。

隱惡揚善，執其兩端。

妻賢夫禍少，子孝父心寬。

既墜釜甑，反顧無益。

反覆之水，收之實難。

人生知足何時足，人老偷閑且自閑。

但有綠楊堪繫馬，處處有路透長安。

見者易，學者難。

莫將容易得，便作等閑看。

用心計較般般錯，退步思量事事難。

道路各別，養家一般。

從儉入奢易，從奢入儉難。

知音說與知音聽，不是知音莫與彈。

點石化成金，人心猶未足。

信了肚，賣了無。

他人睨睨，不涉你目。

他人碌碌，不涉你足。

誰人不愛子孫賢，誰人不愛千鐘粟，奈五行不是這般題目。

莫把真心空計較，兒孫自有兒孫福。

與人不和，勸人養鵝。

與人不睦，勸人架屋。

但行好事，莫問前程。

河狹水急，人急計生。

明知山有虎，莫向虎山行。

路不行不到，事不為不成。  
人不勸不善，鐘不打不鳴。  
無錢方斷酒，臨老始看經。  
點塔七層，不如暗處一燈。  
萬事勸人休瞞昧，舉頭三尺有神明。  
但存方寸地，留與子孫耕。  
滅卻心頭火，別起佛前燈。  
惺惺常不足，朦朧作公卿。  
眾星朗朗，不如孤月獨明。  
兄弟相害，不如自生。  
合理可作，小利莫爭。  
牡丹花好空入目，棗花雖小結實成。  
欺老莫欺少，欺人心不明。

隨分耕鋤收地利，他時飽暖謝蒼天。

得忍且忍得耐且耐，不忍不耐小事成大。

相論逞英雄，家計漸漸退。

賢婦令夫貴，惡婦令夫敗。

一人有慶，兆民咸賴。

人老心未老，人窮志不窮。

人無千日好，花無百日紅。

殺人可恕，情理難容。

乍富不知新受用，乍貧難改舊家風。

座上客常滿，杯中酒不空。

屋漏更遭連夜雨，行船又被打頭風。

筍因落籜方成竹，魚為奔波始化龍。

記得少年騎竹馬，看看又是白頭翁。

禮義生於富足，盜賊出於貧窮。

天上眾星皆拱照，世間無水不朝東。

君子安貧，達人知命。

忠言逆耳利於行，良藥苦口益於病。

順天者存，逆天者亡。

人為財死，鳥為食亡。

夫妻相和合，琴瑟與笙簧。

有兒貧不久，無子富不長。

善必壽考，惡必早亡。

爽口食多偏作病，快心事過恐生殃。

富貴定要安本分，貧窮不必枉思量。

畫水無風空作浪，繡花雖好不聞香。

貪他一斗米，失卻半年糧。

爭他一腳豚，反失一肘羊。

龍歸晚洞雲猶濕，麝過春山草木香。  
平生只會量人短，何不回頭把自量。  
見善如不及，見惡如探湯。

人貧志短，馬瘦毛長。

自家心裡急，他人未知忙。

貧無達士將金贈，病有高人說藥方。

觸來莫與說，事過心清涼。

秋至滿山多秀色，春來無處不花香。

凡人不可貌相，海水不可斗量。

清清之水為土所防，濟濟之士為酒所傷。

高草之下或有蘭香，茅茨之屋或有公王。

無限朱門生餓殍，幾多白屋出公卿。

醉後乾坤大，壺中日月長。  
萬事命已定，浮生空自忙。  
千里送毫毛，寄得不寄失。  
一人傳虛，百人傳實。  
世事明如鏡，前程暗似漆。  
人生一世，如駒過隙。  
良田萬頃，日食一升。  
大廈千間，夜眠八尺。  
千經萬典，孝義為先。  
一字入公門，九牛拖不出。  
衙門八字開，有理無錢莫進來。  
富從升合起，貧因不算來。  
家中無才子，官從何處來。

萬事不由人計較，一身都是命安排。

急行慢行，前程只有多少路。

人間私語，天聞若雷。

暗室虧心，神目如電。

一毫之惡勸人莫作，一毫之善與人方便。

虧人是禍饒人是福，天眼恢恢報應甚速。

聖賢言語，神欽鬼服。

人各有心，心各有見。

口說不如身逢，耳聞不如目見。

養軍千日，用在一朝。

國清才子貴，家富小兒驕。

利刀割體痕易合，惡語傷人恨難消。

公道世間惟白髮，貴人頭上不曾饒。

有錢堪出眾，無衣懶出門。

為官須作相，及第必爭先。

苗從地發，樹向枝分。

父子和而家不退，兄弟和而家不分。

官有正條，民有私約。

閑時不燒香，急時抱佛腳。

幸生太平無事日，恐逢年老不多時。

國亂思良將，家貧思賢妻。

池塘積水須防旱，田地深耕足養家。

根深不怕風搖動，樹正何愁月影斜。

奉勸君子，各宜守己。

只此呈示，萬無一失。

